

# Powšitkowne WOZJEWJENJA

njedźelu, 23. februara 2025

## Putnikowanje młodostnych do Roma

Bamž Franciskus je wšitkich młodostnych na tydzeń młodžiny do Roma přeprósyl. Tón ma so w formaće swětowego zetkanja młodžiny wotměć, to rěka zwiski nawjazać a so zhromadnje modlić. Młodostni su přepróšeni so na putnikowanju z biskopom Heinrichom Timmereversom wot pónđzele do pónđzele, 29. julija do 4. awgusta, wobdźelić. Nimo Roma je Assisi jedna ze stacijow. Zajimcy měli so online přizjewić. Link k tomu kaž tež nadrobny program nańdu pod [www.posol.de](http://www.posol.de).

## Zetkanje samostejacych

Samostejacy ze serbskich wosadow su na swoje lětuše přenje zetkanje wutoru, 18. měrca, w 14.00 hodž. do Smochčanskeho kubłanišća swjateho Bena přepróšeni. Zajimcy njech so hač do wutory, 11. měrca, w redakciji Katolskeho Posoła přizjewja, telefonowe čisło (0 35 91) 55 02 12. Dalši zajimcy, kotřiž njejsu samostejacy, su tohorunja wutrobnje witani. Kóždy njech sej Wosadnik sobu přinjese. Štóż chce wotewzaty być, njech to prošu zdželi.

## Serbska putniska jězba

Na serbsku putnisku jězbu do Weserskich horin wot pónđzele do štwórtka, 14. do 17. julija, přepróšuje Radworske Šmitec-Schwarzec busowe wozydłownistwo. Duchowny nawod změje farar Gabriš Nawka. Přizjewjenja přijimuju w Radworju, telefonowe čisło (03 59 35) 28 60.

## Za dwurěčne wukubłanje JULEICA so přizjewić

Planowany kurs JULEICA w aprylu w Smochčanskim kubłanišću swjateho Bena budže dwurěčny. Za njón su hišće městna swobodne. Wukubłanje wobsteji z dweju dželow, je darmotne a wotměje so stajnje wot pjatka do njedzele, 4. do 6. apryla, kaž tež wot 25. do 27. apryla, w mjenowanym domje z přenocowanjom. Zajimcy měli so nimo toho na kursu přenjeje pomocy wobdźelić. Tón budže sobotu, 15. měrca, we Worklečanskim Don Boskowym domje. Kaž dekanatne dušepastyrstwo zdželi, je wón za wšěch wobdźelnikow zawjazowacy. Přizjewjenja přijimuju online. Link je pod [www.posol.de](http://www.posol.de) podaty.

## Dalekubłanje na polu cyrkwinskeje hudźby

Pod hesłom „Chcu ći spěwać a hrać“ wotměje so wot pjatka do soboty, 14. do 16. měrca, wosebite dalekubłanje na polu cyrkwinskeje hudźby w Smochčanskim kubłanišću swjateho Bena. Pod nawodom tachantskeho kapałneho mištra Christiana Bonatha skića dny bohaty kursowy program za spěwarjow, instrumentalistow a chórowych nawodow. Linkaj k nadrobnišim informacijam kaž tež k přizjewjenju stej pod [www.posol.de](http://www.posol.de) podatej.

## **Dalše předstajenja krucha „Smy! – Bin ich?“**

Serbski ludowy ansambl (SLA) předstaji znova swój rejowanski kruch „Smy! – Bin ich?“. Zhromadnje z baletom SLA zaběra so choreografka Gundula Peuthert w nim z prašenjom serbskeje identity. Předstajenja budu mjez druhim pjatk, 21. měrca, w 19.30 hodž., njedźelu, 30. měrca, w 17.00 hodž., sobotu, 12. apryla, w 19.30 hodž., a njedźelu, 13. apryla, w 17.00 hodž., stajnje na žurli SLA w Budyšinje. Link k nadrobnišim informacijam je pod [www.posol.de](http://www.posol.de) podaty.

## **Chorych a mrějacych přewodźeć nawuknyć**

Ambulantna hospicna služba Hornjołužiskeho zwjazka Carity z.t. w Kamjencu poskićuje lětsa zaso kurs k čestnohamtskemu přewodženju ćežkochorych a mrějacych. Štóz chcył wukubłanje absolwować, měł so pola hospicneje služby Carity w Kamjencu přizjewić. Link k nadrobnym informacijam je pod [www.posol.de](http://www.posol.de) podaty.